



ज्वजलपा बाह्यो

JWOJALAPA NEPALBHASA WEEKLY

दैं ६ ल्या: ४५ (पूर्णडक ९७) ने. सं. ११३६ बछलागा अस्तमी आइतवा: २०७३ जेठ १६ गते आइतवार (May- 29, 2016)

मू ८।-

पपुलर बजेट कार्यान्वयनय् न्ह्यस:

थुगसीया बजेट गज्व:गु ?



ज्वजलपा वा:पौ/

गणतन्त्र दिवसया दिनय् लाका अर्थमन्त्री विष्णु पौडेल शनिवा: व्यवस्थापिका संसदय् आर्थिक वर्ष २०७३/०७४ या नितिं न्ह्यव्वयादीगु बजेट पपुलर जूगु दुसा कार्यान्वयनया सवालय् न्ह्यस: ब्वलंगु दु।

न्हापा एमालेया ९ महिनाया कार्यकालय् न्ह्यव्व:गु बजेट थें हे जुइक थुगुसी नं एमालेया नेतृत्वया सरकार बजेट ह:गु दु। १० खर्ब ४८ अर्ब ९२

करोड तकया बजेट न्ह्यव्व:गु दुसा पपुलर जुइगु कथंया ज्याभ्व:त नं दुथ्याकूगु खने दु।

बजेटया लक्ष्य आर्थिक वृद्धि ६ दशमलव ५ प्रतिशत अले मूल्य वृद्धि ७ दशमलव ५ प्रतिशत या:गु दु। अथे हे सांसदतयगु सुविधा अप्वयेकूगु दुसा छम्ह सांसदयात साढे ३ करोडया बजेट फ्या:गु दु। अथे हे वृद्धभत्ता निदुगं अर्थात दोब्बर या:गु दुसा बैंक खाता अनिवार्य

चायेकेमा:गु व्यवस्था या:गु दु। अथे हे स्वंगु अन्तर्राष्ट्रिय विमानस्थालया नितिं पौने १४ अर्ब तक फ्या:गु दुसा स्वर्दया दुने हे फुक्क नेपा:मि जनताया अनिवार्य स्वास्थ्य विमा यायेगु धका: घोषणा या:गु दु।

कर्मचारीया तलब २५ प्रतिशत अप्वयेकूगु दु। बर्दिया, सुर्खेत व बुटवलय् चिकित्सा क्याम्पस, अयोग्य लडाकुयात निगू लख तक विइगु अले जनयुद्धया घा:पा: जूपिं सकलसित नि:शुल्क वास: यायेगु व्यवस्था या:गु दु।

अथे हे डिजेल-पेट्रोलया भा: प्रतिलिटर न्यातका थकायेगु घोषणा या:गु दुसा पुन: निर्माणया नितिं एक खर्ब ४० अर्ब तक दां फ्या:गु दु। अथे हे ४ लखम्ह युवातयत लजगा: विइगु घोषणा या:गु दु।

थुगु कथं पपुलर बजेट ह:गु दुसा थुगु बजेट कार्यान्वयन गुगु कथं याइगु ख: अले गनं लोकप्रियताया नितिं जक थज्व:गु बजेट घोषणा या:गु मखुला धका: न्ह्यस: तयाह:गु दु।

संघीय गठबन्धनय् आबद्ध राजनीतिक दलतपाखें बजेट भाषण बहिस्कार



ज्वजलपा वा:पौ/

व्यवस्थापिका संसदय् सनिवा: न्ह्यव्व:गु बजेटयात आन्दोलन याना वयाच्वंगु संघीय गठबन्धनय् दुथ्या:गु राजनीतिक पार्टीया सांसदतय्सं बहिस्कार या:गु दु। संघीय गठबन्धनपाखें राजधानी केन्द्रीत आन्दोलन वंगु जेठ १ गतेनिसं न्ह्याका वयाच्वंगु ख:।

थ:पनिगु माग पूरा मजुतले आन्दोलन यायेगु घोषणा याना लगातार रुपं संसदया बैठक बहिस्कार याना वयाच्वंगु संघीय गठबन्धनय् आबद्ध जुयाच्वंगु संघीय समाजवादी फोरम नेपाल, तमलोपा, फोरम, जनजातस्या राजनीतिक पार्टी नापं थीथी राजनीतिक दलया सांसदतय्सं बैठक हे बहिस्कार या:गुलिं इपिं च्वनीगु कुर्सी खाली जुयाच्वंगु खने दु।

जेठ १८ गते हाकूगु न्हि हनेनु

जारी जूगु संविधानय् तकं भाषिक अधिकार सुनिश्चित मजुगु, भाषाख्यलय् विभेद यानात:गु अले नेवा: भाय्यात प्रदेशय् तकं छ्यलेगु अधिकार बिया मत:गु थौंया इलय् भाषिक अधिकार हनन जूगु दिंयात लुमंका: ज्यापु महागुथि किपू नगर समितिपाखें जेठ १८ गते हाकूगु न्हि हनीगु जुया भाषिक अधिकारयात कया: स: तया वयाच्वंपिं सकलसित सहभागी जुइत इनाप यानाच्वना।

हाकूगु न्हि हनेगु जेठ १८ गते

मुनेगु थाय्: लोकतान्त्रिक चोक, न्हुबजा: किपू ई सुथसिया ७ ता इलय्



ज्यापु महागुथि
किपू नगर समिति



ज्वजलपा वाःपौ

सल्लाहकार

श्रीकृष्ण महर्जन

प्रकाशक:

नजरराम महर्जन

सम्पादक

श्रीकृष्ण तण्डुकार

ले-आउट:

ज्वजलपा डेस्कटप

संवाददाता

भरत महर्जन, निरजमान सिंह

थाकू

प्रिन्ट स्काई, येँ

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : kirtipur_sandesh@live.com

सम्पादकिय

ओली सरकारं न्ह्यब्वःगु

बजेटया सवाल

एमालेया अध्यक्ष केपी शर्मा ओलीया नेतृत्वय् दुगु वर्तमान सरकारं हःगु थुगुसीया बजेट लोकप्रिय बजेट खने दुसा बजेट कार्यान्वयनया सवालय् धका: थीथी पक्षं न्ह्यस: थनाहःगु दु ।

अथे हे डिजेल-पेट्रोलया भा: प्रतिलिटर न्यातका थकायेगु घोषणा या:गु दुसा बजेट मूल रुपं कर्मचारीतय्त लये तायेकेगु ज्या या:गु तर जनताया नितिं धा:सा खास हे ज्याभूव: महःगु बरु अखतं बजा: भा: थकायेगु ज्या या:गुलिं जनताया नितिं खास हे बांला: धायेफइगु अवस्था मदु धायेगु याना हःगु दु । युवातय्त लजगा: विइगु थें जा:गु बांला:गु ज्याभूव:निसें ज्याथ: ज्याथीपिन्त बृद्ध भत्ता निदुगं अप्वयेकेगु घोषणा या:गु धइगु न्हापा एमालें हे हःगु बजेटया निरन्तरता विइगु कुत: ख: धका: धायेफइगु अवस्था दु ।

स्वदँया दुने फुक्क नेपा:मिपिनिगु स्वास्थ्य विमा यायेगु थेंजा:गु लोकप्रिय ज्याभूव: नं घोषणा या:गु दु । थुगु ल्याखं स्वल धा:सा बजेट तसकं बांला: खने दुसा बजेट कार्यान्वयनया सवालय् धा:सा न्ह्यस: ब्वलना वःगु दु । वर्तमान सरकारया बजेटयात कया संसदय् सहलह व्याके धुका: पारित याइगु जूगु दु । एमालेया नेतृत्वय् एकीकृत माओवादीनिसें राप्रपा नेपाल तकं दुथ्यानाच्वंगु वर्तमान सरकारया उगु बजेटयात कया सत्तापक्ष दलतय्सं प्रशंसा या:गु दुसा विपक्षी दलतय्सं धा:सा आलोचना सुरु यानाहःगु दु ।

साहित्य/चिनाखं

हाईकू शौरभ शाक्यया

शौरभ शाक्य

खवप

७९.वैय् चा:गु नाका

हु वःगु नाकाबन्दी

प्यागं धरना ।

८०.कँभालय् दुने

निभा:या तेलकासा

मात्या कथं क: ।

८१. खिउँ कुतुं व:

चिच्छि चा खया: खया:

सुर्ख लुमका ।

८२.पुन्हिया चान्हय्

नगु सुला सुला जू

तिमिला तयजु ।

८३. सर्ग नुगपा:

ब्रम्हाण्ड लु चकन

अनन्त था:गा: ।

८४.बांला अन दु

गन नुग: आकास

य:या खु न्ह्याई ।

किपूमितसं पृथ्वीनारायण शाहया न्ह्योने आत्मसमर्पण या:गु मखु..... ! ?



प्रयाग मान प्रधान

नेपाल सम्वत् १९३६ नवमि आइतवा: (२०७३ जेठ २ गते) पिहाँ वःगु “ज्वजलपा वा:पौ”लय् नजरराम महर्जनया “छु किपूमितसं पृथ्वीनारायण शाहया न्ह्योने आत्मसमर्पण या:गु खःला ?” च्वसुइ जिगु मिखा लात । ब्वना बना । किपूया आराध्यदेव आजुद्यःया देगःलागा मर्मत सम्भार जुयाच्वंगु ज्या तःसकं च्छाय् बहजु । थ्व ज्याया न्ह्यलुवापिन्त यक्व यक्व शुभायया नापं वयकपिन्त फूचागु ग्वाहाली यायेमा:, ग्वाहाली यायेगु सकलसिया कर्तव्य नं ख: ।

च्वसुया २३ भोलय् (ध्याखाया दुने खवय् तया:तःगु फ्लेक्सय्) “स्थापना (नेपाल सम्वत् २१९-२४६ अर्थात् थ्व मन्दिर ने.सं. २१९ निसं २४६ तकया दुने स्थापना जूगु जुइमा धया:तगु खःला ? संस्थापक शिवदेव तृतीय अर्थात् शिवदेव तृतीय धा:म्ह जुजुं पलिस्था या:गु धया:तःगु जुइमा । यदि थथे खःसा गलत ख: । बाघभैरव गवले सुना पलिस्था अर्थात् स्थापना यात धइगु गन हे उल्लेख मदु ।” ख: थौतक अजोगु स्रोत मखनि, थीथी सफू वंशावलीइ न्ह्यब्वया तःगु ब्वनाकथं ने.सं. २१९ निसं २४६ तक शिवदेव तृतीय पाखें राज्य या:गु ई ख:, उलि ई विका बाघभैरव स्थापना या:गु धइगु मखु । गोपालराज वंशावली २४ पत्रय् “कीर्तिपुर मा बलबलदेवीकहाँ तपस्या गरी बलखु नदीमा बाँध बाँधे, ठाउँ ठाउँमा हुंगेधारा, कुवा, पोखरीहरु बनाए । चारतले पञ्चपुर सहितको श्रीराजगृह राम्ररी जग हाली बनाए” धइगु न्ह्यब्वया तःगु दु । शिवदेव बाघभैरव स्थापना यानावंगु खःसा थथे न्ह्यब्वया मतइला ?

च्वसुया ६३ भोलय् “ने.सं. ८८६ (६ महिनाको नाकाबन्दी पछि आत्मसमर्पण)...” फ्लेक्सय् च्वया:तःगुयात असहमतिया नापं न्ह्यस: थना विल, छु किपूमितसं पृथ्वीनारायण शाहया न्ह्योने आत्मसमर्पण या:गु खःला ? थ्व आत्मसमर्पणयात सुं नं किपूमिं सर्लक समर्थन याये फइ मखु, इतिहासकारपिन्सं अपुक थ्व खँ ग्व: छाय्, गुकथं छ्यल न्ह्यस: दु, शंका हे दु । थ्व खँ ग्व: छ्यलातःगु विवादित हे ख: । इतिहासकार पिन्सं युद्ध इलयया वर्णन याना: तःकथं किपूमिं आत्मसमर्पण या:गु खःला कि मखु वा आत्मसमर्पण धाय्छि ला कि मछि ?

इतिहासया पाना पानातय्के पृथ्वीनारायण शाहया किपू नाप जूगु युद्धय् गुलि क्षेति जुल ? गुकथं युद्ध याये माल ? माला वनेबलय् लुइ । सर्लक विजय जुल वा आत्मसमर्पण यात धायेबलय् वीर किपूमिं पिन्त हिस्यायेगु जुइ ।

डा.श्रीरामप्रसाद उपाध्यायनं च्वया दिइगु नेपालको प्राचीन तथा मध्यकालीन इतिहास सफुली “युद्धबाट कीर्तिपुरलाई जित्न नसक्ने देखि पृथ्वीनारायण शाहले कूटनीतिक सहारा लिए” धइगु च्वया:तःगु दु ।

प्रा.डा. तुलसीराम वैद्य व तीर्थप्रसाद मिश्र निम्ह जाना च्वया: दिइगु आधुनिक नेपालको राजनैतिक इतिहास सफुली “ई.सं १७५७ को हारपछि उपत्यकालाई सैन्य शक्तिबाट जित्न सजिलो नभएकोले कान्तिपुरलाई आर्थिक नाकाबन्दी गरी घुंटा टेकाउने सुरु गरे । नुन र कपास छिर्न नदिने, लुकिछिपि व्यापार गर्ने ब्राह्मण भए पाता कस्ने, अन्य जाति भए टाउको काट्ने आदेश दिए । नाकाबन्दीको नराम्रो असर पच्यो ।

कीर्तिपुर चारैतिरबाट घेराबन्दी गरिएको थियो । गोरखाले कीर्तिपुर विजय गर्न साम, दाम, दण्ड र भेदको नीति अवलम्बन गरे । धनवन्त काजीका छोरालाई गोरखालीले नजरबन्द गरी नुवाकोट लिएर गए । धनवन्त काजीलाई आत्मसमर्पण गरी आफ्नो पक्षमा आउन दवाव दिन थाले । कीर्तिपुरेहरुसँग आत्मसमर्पण गर्नुको अलावा विकल्प थिएन । अतः उनीहरुले ई.१७६६ मा शहरको पश्चिम ढोका खोले दिए” च्वया:तःगु दु ।

विदेशी विद्वान सिल्भालेभीं च्वया:दिइगु नेपाल हिन्दू अधिराज्यको इतिहास सफुली “कीर्तिपुर गौरव नगरले प्रख्यात छ । पाटनको अधिनमा भए पनि यो आफै एउटा सानो राज्य जस्तो थियो, पृथ्वी नारायणले घोखा दिएर मात्र जित्न सके” धइगु खँ न्ह्यब्वया तःगु दु ।

किपूली जूगु युद्धया ई थीथी थासय् थीथी दु मिले मजु । फ्लेक्सय् ने.सं. ८८० निसं ८८६ तक ६ वर्ष, डा.श्रीरामप्रसाद उपाध्यायनं च्वया:तःकथं वि.सं. १८९४ निसं १८२२ तक ८ वर्ष, प्रा.डा.तुलसीराम वैद्य व तीर्थप्रसाद मिश्रपिन्सं च्वया:तःकथं ई.सं.१७५७ निसं १७६६ तक ९ वर्ष, किपूली न्यनेकने दुकथं १२ वर्ष युद्ध जुल धइगु दु, गुगुयात पत्या यायेगु ? थथे च्वया:तःगु विवादित जुलधासा न्यनेकने व व्यवहारे जुयावयाच्वंगु यातहे पत्या याये बहजुई । जनश्रुति वा न्यनेकने याना:वया: च्वनागु धइगु म्हिग जूगु ज्याखँया निरन्तरता ख: ।

छगू उदाहरण मोहनीबलय् क्वा:च्व आगछेंनं सिन्ह:मु ज्वना वइगु धार्मिक सांस्कृतिक पर्व न्ह्याना च्वंगु दु, तर पा:या: अर्थात् खड्गजात्रा धया:वया:च्वंगु दु, सिन्हमुजात्रा मथा, छाय्धासा न्हापा पाया:

विवरण न्ह्यब्वयेगु नामय् किपूमिया आत्मसम्मानय् धा:जुइगु खँ न्ह्य:ब्वय् मा:थें नं मच्चं ।

वादविवाद याना: च्वनेगु सिवेन्तु थ्व विवरण लिकायेगु वेस जुइ । ज्या यायां वनेबलय् दोविदों जुइफु । जस अपजस ज्या याइपिन्त हे वइ । कमिकमजोरी सुधार हे प्रगतिया आधार ख: ।

(खड्गजात्रा) हे जुइगु ख: पृथ्वीनारायण शाहनं किपू कब्जा लिपा पाया: (खड्गजात्रा) मजुगु ख:, अथेजुया पाया: (खड्गजात्रा) हे धयावया:च्वंगु ख: (च्वमिया किपूया पाया: च्वसु ब्वना दिसं) । जनश्रुति वा न्यनेकनेया विपरित जुया:च्वंगु ज्या-खँ भीगु संस्कृति, भीगु इतिहास व सत्यतथ्य विपरित हस्तक्षेप व प्रायोजित ख:, थथे प्रायोजित खँयात गथे पत्या यायेगु ?

जनश्रुति वा न्यनेकने दुकथं भिनिदँ तक युद्ध जूगु व छन्हू छम्ह गद्दारं चान्हय् ध्याखा चायका ब्यूगुलिं गोरखाली फौज दुहाँ वया: न्ह्य:ने लाकवसित धा:पा यायां, ल्वाल्वां वःगु अन्तिमय् किपुलि शक्ति देवी दुर्गाभवानी साधना याना ल्वाभ: तया:तइगु कोत आगछेंनं ल्वाभ ज्वना इपिलिसे क्वा:च्वय् युद्ध यात, व युद्धय् मिजंया वसतं पुना मिसां पिं न्वागु मध्ये वीरतापूर्वक ल्वाना वीरगति का:म्ह छम्ह मिसा योद्धा भैरव सिं नां थौतक नं प्रख्यात जुयाच्वंगु हे दु ।

युद्धया २३ वर्ष लिपा थःगुहे मिखां खँ कथंधका विदेशी इतिहास च्वमिं कर्कषट्टिकं न्हाय् ध्यंगु धइगु दसी विया च्वया:तःगु पत्या याये बहजु । २०० वर्ष लिपा वया: श्री ५ महाराजाधिराज सम्वाद सचिवालय, राजदरबारया प्रकाशकत्वय् श्री ५ बडामहाराजाधिराज पृथ्वीनारायण शाहको संक्षिप्त जीवनी सफूली किपूमिं आत्मसमर्पण या:गु खँ न्ह्यब्वसं न्हाय्चागु धइगु कथन विदेशीतयगु पागलपन प्रलापसमान ख: धका तत्कालिन राज्यशक्ति प्रचारे हया:तःगु खँ ख: । अथेजुया आत्मसमर्पण धका धायेगु सिवेन्तु पड्यन्त्रपूर्ण कब्जा जूगु धाये जक बहजुइ । विवरण न्ह्यब्वयेगु नामय् किपूमिया आत्मसम्मानय् धा:जुइगु खँ न्ह्य:ब्वय् मा:थें नं मच्चं । वादविवाद याना: च्वनेगु सिवेन्तु थ्व विवरण लिकायेगु वेस जुइ । ज्या यायां वनेबलय् दोविदों जुइफु । जस अपजस ज्या याइपिन्त हे वइ । कमिकमजोरी सुधार हे प्रगतिया आधार ख: ।

गठबन्धनपाखें रिले अनसन तक्या संघर्ष घोषणा याइगु

येँया जुलुसय् नेवा: ध्वाँय् सहित
नेवा:तय्गु सहभागीता

ज्वजलपा वा:पौ /

२९ दल व गठबन्धनया मंका:गु मोर्चा संघीय गठबन्धनपाखें लगतार रुपं आन्दोलन याना वयाच्वंगु दु। काठमाडौं केन्द्रित आन्दोलनया लिपांगु ज्याभवःकथं म्हिगः सतिवा: असनय् मुना: जुद्ध सतक्या सालिकय् तःधंगु आमसभा यात। उगु सभाय् नेकपा माओवादी क्रान्तिकारीया केन्द्रीय सदस्य पवन मान श्रेष्ठया नं उपस्थिति दुगु खः।

वय्कःया पार्टी छु दिं न्ह्यः बैठक च्वना संघीय गठबन्धनया आन्दोलन सही खः धा:सैं थःपिनिसं नं समर्थन यायेगु वःछयूगु खः। असनं सुरु जूगु जुलुसय् नेवा:तय्सं नेवा: स्वायत्त राज्यया ध्वाँय् तकं ज्वना सहभागी जूगु खः।

बसन्तपुरय् छगू सभायासैं संघीय गठबन्धनया नेतातय्सं गबले तक नेपा:या आदिवासी जनजाति, मधेसीनिसैं उत्पीडित समुदायया माग पू वनीमखु अबले तक आन्दोलन जारी हे जुयाच्वनी धका: धयादीगु खः।

नेवा: स्वायत्त प्रदेशया सुनिश्चितताया माग याना नेवा:तय्गु मंका:गु मोर्चा नेवा: स्वायत्त राज्य मंका: संघर्ष समिति नं संघीय गठबन्धनया घटकया रुपय् निरन्तर रुपं आन्दोलनय् सहभागी जुयाच्वंगु दु।

समानता, समानुपातिक समावेशी, संघीयता, पहिचानया आधारय् प्रदेश निर्माण, विगतय् आदिवासी जनजाति, मधेसीनिसैं उत्पीडित समुदायलिसे राज्यपक्षं या:गु सहमति कार्यान्वयन यायेमा:गु लगायतया माग तथा जेठ १ गतेनिसैं राजधानी केन्द्रीत आन्दोलन याना वयाच्वंगु खः।

थ्व हे भवलय् कंस स्वनिगलं पिने पोखराय् तःजिगु सभा याना स्वंगूगु चरणया आन्दोलन घोषणा याइगु जूगु दु। आ: घोषणा याइगु आन्दोलन धइगु प्रदर्शननिसैं रिले अनसन तक्या जुइ धका: नेतातय्सं धयादीगु दु।



पहिचानया माग याना किपुलिङ्ग संघीय गठबन्धनया जुलुस व सभा

लिम्बुवान प्रदेशया नेवा: धायेगुली जिं गर्व तायेका च्वना, पहिचानया प्रदेश जातीय प्रदेश मखु— इन्द्र कुमार श्रेष्ठ, उपाध्यक्ष संघीय लिम्बुवान पार्टी

ज्वजलपा वा:पौ /

पहिचान, समानुपातिक समावेशी, भाषिक समानतानिसैं कया: न्हापा आदिवासी जनजाति, मधेशीतय नाप जूगु सम्भौता कार्यान्वयन यायेमा:गु माग याना संघीय गठबन्धन वंगु सोमवा: जेठ १० गते किपुली प्रदर्शन यात।

संघीय गठबन्धनय् दुय्यागु २९ गू दलया नेता कार्यकर्तापिं किपू ध्वाखाय् मुना: जुलुस पिकया: किपू देय् चाहिला तगःवपि थ्यंका सभाय् परिणत जूगु खः। नजरराम महर्जनं न्ह्याकूगु उगु सभा नेपा: राष्ट्रिय पार्टीया नाथो सुवर्ण केशरी चित्रकारया नाथोसुइ जूगु खः। मनरत्न शाक्य लसकुस न्वचु बियादीगु खःसा। नेकपा माओवादी क्रान्तिकारीया रमेशकुमार महर्जनं नं थःगु नुगःखँ तयेगु भवलय् पहिचानया थ्व आन्दोलनय् थःगु पार्टीया नं पूर्ण समर्थन दु। आन्दोलनय् थःपिं नं सहभागी जुयागु खँ कनादिल।

संघीय लिम्बुवान पार्टीया उपाध्यक्ष इन्द्र कुमार श्रेष्ठ थःगु नुगः खँ तयेगु भवलय् धयादिल, “जि छम्ह नेवा: खः। न्हापा जिमि पुर्खापिं पृथ्वीनारायण शाहया अत्याचार सहयाये मफया: भोजपुर जुया थौकन्हे ताप्लेजुडय् च्वनाच्वना। पहिचान सहितया लिम्बुवान प्रदेशया नििति जि आन्दोलनय् कुहाँ वयाच्वना। लिम्बुवान धइगु जातीय प्रदेश मखु। लिम्बुवानय् लिम्बुत जक च्वनीगु मखु। अन नेवा:,



राई, ब्रम्हु न्ह्याम्हं च्वनेफु। गथे कि स्वनिगः नेवा:तय्गु पहिचान खः। नेवा: प्रदेश जुल धा:सा मोपिं च्वने मदइगु मखु। थ्वला भीसं भीगु भाषिक अधिकार समावेशी समानताया लागि सः थ्वयेका च्वनागु खः। जि लिम्बुवानया नेवा: धायेगुली थःत गर्व महसुस यानाच्वनागु दु।” अथे हे नेवा: न्ह्यलुवा मल्ल के सुन्दरं एकात्मवादी सरकारया मिखाय् भीपिं देश टुकुर्य याइपिं, जातीय दंगा याइपिं कथं चित्रण यानाच्वंगु दु। न्हापा इमि नाप जाना: आन्दोलन यायेवलय् देशभक्त जुइगु, आ: इमिगु एकात्मक नीतिया विरोध यायेवं भीपिं देशद्रोही जुइगु खःला

? म्हिगः पंचायत कालीनिसैं थःगु हक अधिकारया निितिं ल्वाना वयाच्वनागु थौ गणतन्त्र वयेधुंका: नं संघर्ष हे यानाच्वनेमाल। व्यवस्था परिवर्तन जुल। तर सत्ताय् च्वनीपिं मनूतय्गु बिचा: परिवर्तन मजुल। भीपिं न्ह्यावलें शोषितया शोषित। उकिं भीगु अधिकार कायेगु निितिं भीपिं सकलें आन्दोलनय् कुहाँ वयेमाल धयादिल।

अथे हे संघीय समाजवादी फोरम नेपालया सहअध्यक्ष राजेन्द्र श्रेष्ठ जनता भुखाचं याना: गनच्वने छु याये छु याये जुयाच्वंगु अवस्थाय् थः सत्ताय वने हथाय् चाया: फास्ट ट्रयाकया नामं अन्तरिम संविधानं ब्यूगु अधिकार नापं क्वपाला

शाहवंशीय धारणा कथं एक जाती, एक भाषाया नीतिया अविलम्बन याना: छगू जक जातीया वर्चस्व जुइगु कथं नां मदुगु संघीय प्रदेश दयेकल। संघीयता धइगु हे महिचानया प्रदेश जुइमा:गु खः। नेपाल बहुभाषिक, बहुधार्मिक देश धाइगु तर मेगु फुक्क भाषा भाषीयात हाकुतिना: छगू जक भाषायात सरकारी मान्यता बिया: मेगु भाषाभाषीपिन्त न्हंकेगु कुतः या:गुलिं भीसं आन्दोलन यायेमा:गु खँ कनादिल। अथे हे वार्ताया नामय् आन्दोलनकारीतयगु गठबन्धन तःछ्यायेगु तातुना: वार्ताया निितिं मधेशी मोर्चायात जक पौ छ्वयाहल। गबलेतक संघीय गठबन्धनया नामय्

पौ वइमखु वार्ताय् च्वनेगु जुइमखु। आ: थ्व आन्दोलन मधेशीतय्गु जक मखय् धुंकल हिमालीनिसैं तराईतकया फुक्क आदिवासी जनजाति, मधेशी व शिल्पीपिनिगु आन्दोलन जुइधुंकल उकिं थ्व आन्दोलनयात राष्ट्रिय आन्दोलन धायेमा धयादिल।

उगु सभाय् सामाजिक लोकतान्त्रिक पार्टीया अध्यक्ष कुमार राई, संघीय महिला गठबन्धनया सुशीला शाक्य, सद्भावना पार्टीया उपेन्द्र महतो, राष्ट्रिय शिल्पी आन्दोलनया दान बहादुर विश्वकर्मा, र राष्ट्रिय मधेश समाजवादी पार्टीया केसव भा, भाषिक अधिकार संयुक्त संघर्ष समितिया संयोजक अमरेश नारायण भा, नेपा: राष्ट्रिय पार्टीया महासचिव विजय सैजु, खसान संघर्ष समितिया अध्यक्ष प्रेमबहादुर खाती, संघीय जनमुक्ति पार्टीया रविन्द्र थिङ, तराई मधेश सद्भावना पार्टीया महासचिव रामकुमार मण्डल, बरिष्ठ नेता गोपाल दहितं न्ववानादीगु खः।

उगु ज्याभवलय् कृष्णहरि महर्जनं सुभाय् न्वचु बियादीगु खः। उगु सभाय् संघीय गठबन्धनया संयोजक व संघीय समाजवादी फोरम नेपालया अध्यक्ष उपेन्द्र यादव, बरिष्ठ नेता अशोक राई, तराई मधेश सद्भावना पार्टीया अध्यक्ष महेन्द्र राय यादव, संघीय लिम्बुवान पार्टीया अध्यक्ष कुमार लिङ्देन लगायत मेमेपिं यक्व नेतापिनिगु नं उपस्थिति दुगु खः।

पाठक प्रतिक्रिया

छु किपूमितसें पृथ्वीनारायण शाहया न्ह्योने आत्मसमर्पण या:गु ख:ला ?

नेपाल सम्बत् १९३६ नवमि आइतवा: (२०७३ जेठ २ गते) पिहाँ व:गु “ज्वजलपा वा:पौ”लय् नजरराम महर्जनया “छु किपूमितसें पृथ्वीनारायण शाहया न्ह्योने आत्मसमर्पण या:गु ख:ला ?” लेखया बारे फेसबुकय् व:गु बिचा: व धापूत गथे ख: अथेहे थन न्ह्यव्याचवना— संपादक)

1.Maharjan Ratna जिं थुकियात सुभाय पोस्ट वा: पति न पिकया बी

2.Roshan Shrestha नेवा: इतिहासकार पिन्सं न्ववायेमाला

3.Raju Napit किपूमिं गोर्खाली सेनाया न्ह्य:ने आत्मसमर्पण या:गु खँ गलत ख:। थुकिया प्रमाण थक्वातय् च्वंगु त्रिभुवन पार्क दुने च्वंगु न्हाय्दं। गन किपुमितयगु न्हाय् ध्यना ल्हाकूगु थाय् ख:। न्हाय् ध्यंगु कारण: किपूमितय् नाप युद्ध जूबले निक्व:तक त्याके मफया थ: सेना कालु पाण्डे स्या:गु व किजा सूर प्रतापया मिखा तछ्या:गु नापं स्वक्व: तक ल्वाना नं त्याके थाकूगु बल्ल नाकाबन्दी याना त्याकेमा:गु खँय् तँपिकया पृथ्वीनारायण शाहं क्रुर तानाशाह प्रवृत्तिं मस्त मिस्त बुराबुरी सुयातं मत्वतुसें न्हाय् ध्यंगु ख:।


4.Suddha Maharjan जिं सिउगु जकक दकों सत्य गुब्जे जुइमखु अथे जुया छुं खं चोया चोना। धुं वहा: आजु छो, व्याघ्रेशोर भैरवयात राना काल लिपा जक बाघ भैरव धागु ख:। व्याघ्रेशोर भैरव देग: थौया रुपे शिव देव तृतीय नं दयेकुगु ख:।

गुर्खाली युद्ध या ख्यं १२वर्ष तक दुने पटक पटक युद्ध जुल। ततधंगु युद्ध २ व्को तक जुल उगु युद्धय् यें,येल या ग्वाहाली दया किपु बिजय जुल लिपा ग्वाहाली मदया नाकाबन्दी जुया नये त्वोने छुं मदया आत्मसमर्पण यागु हे ख:। आत्मसमर्पण यापित हे पृथ्वीनारायण साहं क्रुर हिंसा दमन याना न्ह्याय, न्हेपं, म्हुतुसी ध्यंगु ख:। थनलिं गुर्खा लिहां वोम्हं त्शुली व तादी खुशी दोभान देविघातय धुं न्यानां हे राजा पृथ्वीनारायणया मृत्यु जुल। १२गु पुस्ता लिपा वंश हे नास जुल। थो ला इतिहास जुलका थोयात हुये फे म्खुत। तर थौतक्क गुलिनं नेतात बल वोहे भ्वाथगु खं ल्हाना भी नेवा:तयेत ल्होना छुवाना चोन आनं भी अथेहे खला। खं जक ल्हासा यक्को हे दिन, न्हापां प्वा नि जाये माल !

5.Maharjan Ratna छिगु खँय् आधार खने दु अझ पूर्वक कना:दिसैं। अले प्रमाण नं बियादिसैं।

6.Anil Maharjan SYNTAX ERROR can RESULT various answers

7.Akarshan Pradhan अन्वयषण पुमवंक सुना नं छु च्वया तल धका उकेयात हे ख: धका थुइके मज्यू। खयतला मल्लकाल लिपा च्वयातगु नेपालया इतिहास हे पूमवं धैगु न्यना वयागु हे ख:। अलय वयाँ लिपा च्वइपिं च्वसु नायोतयगु च्वसा गथेजुया सुथाँलाइ। अथे जुगुली जनश्रुती धागु हे पक्का जुइ धका



नं धायत थाकु। थुकिया लागि न्हुगु कथंया अन्वयशन, अध्ययन यायमा थें च्वं, सुभाय

8.Anil Maharjan Nirman drutgati ma hoss. satyata ka lagi kuro chaldai garxa.

9.Indra Pd Shrestha उहिले कुरा खुइलियो। इतिहास साक्षि दु आत्मसमर्पण यागु ख म्खु।

तर आ ब्रम्ह शासकतयगु न्ह्योने चाहिँ आत्मसमर्पण याना चोंगु हे ख थें चों।

10.Saral Gopal Maharjan इतिहास न्ह्याब्लें त्या पिनिगु जक चोयातगुलिं जकं थथे जुगु खला म्यगु खंला दुग्यन्क अन्वेषण व अध्ययन याना स्वसा जक वास्तविक खँ लुया वोइ

11.Anilman Phay ख: ईतिहास न्ह्याबलें त्या:पिन्सं च्वई। अले बूपिनिगु ईतिहास जनश्रुति जुयाचवनी। जिनं उखुन्हु अन वनागु ख:। उगु फ्लेक्सत वनागु ख:। थितिमिति त्व:मंसा गनं छुं मगा:मचा: जुथें ता:गु। आत्मसमर्पण ख: म्खु धायेमफुत।

थथे थ:गु थासय् थ:पिन्सं थ:पिनिगु साहसिक ईतिहासयात म्बार्यचिकेगु ज्या बाँलागु म्खु। आधिकारिक मनुखं अज्या:गु लिस: वीगुनं पायछि म्खु। गनं उपिं दनिनाकि छुं ???? गुपिन्सं देयात गद्दार याना: पृथ्वीनारायणयात ग्वाहालि यात। अझनं किपुलि अज्यापिं दनीगु ख:सा छुं ल्यं दनीगु ईतिहासनं अन लायकूया जगनिसें न्हं कुथें न्हंकेत छुं वेर मदु। स:स्युपिं किपुमितयसं छुं स्वयाचन ??

12.Bekharam Maharjan नजरराम दाजु किपूया भिंगु चिउता तया थ्व बाँलागु सकस्या थुइकी मागु पायछी खं न्ह्यथनादिल छित यकु सुभाय दु। जित लगे जु किपूया इतिहास नाप पहिचान थौया पुस्तातयसं ध्वाथुक सिईका सयका होस चायका कायमागु दु।

जिगु चिकु बिचार कथं फ्लेक्स बोर्ड सार्वजनिक पिनि याये न्ह्यो पुरातत्वविद व इतिहासविद ससिउपिन्के सत्यतथ्य न्यनेकन्ये याना प्रमाण सहित सार्वजनिक यागुजुसा यकु हे बालाई ताया, म्खुसा व बिषयले खं तया पिनि सार्वजनिक मयानादिसा ज्युथे ताल छाथ धायबले भीत पिनि च्वपिंस हेप्ये याकिगु तधगु लं तयथे जुई ला। जि न्यनातया कथं आत्मसमर्पण यागु धागु मन्यना। यें, यल, भोट, खोप, नाप थ्वयान पिनि च्वपि मनुपिन्स आतक किपूमी छिपी तसक इमान्दार व बहादुरपि ख, थगु सत्यता व थायवायया लागि शत्रुतय लिसि मालधारा स्यायन फुपि सि न फुपि धका प्रसन्न याना धयाचवगु साक्षी आन दिन। जय बाघ भैरव।

13.Hari Krishna Maharjan This might be the result of money offer to the renovation committee

साहित्य/चिनाखं

शिक्षा (Education)



कवि राम महर्जन,
नगां, किपू-१६

ज्ञानया अपार भण्डार ख: शिक्षा

मान सम्मानया श्रोत नं ख: शिक्षा

मर्चानिसें वनेमा:गु ख: शिक्षा

भीगु जीवन अपुक चले यायत मा: शिक्षा ॥

न्ह्याम्हसें न्ह्याक्व: कासां फुइमखु शिक्षा

भीसं गुलि कायफत उलिहे बांला शिक्षा

सुनां काल वैत जक दैगु शिक्षा

मेहनत याना मकायकं दैमखु शिक्षा ॥

धेवा दया न दैमखु शिक्षा

धेवा नं मा: मन नं मा: दयकेत शिक्षा

म्हुतु दसा लाटा थें जुइमाली मन्तिक शिक्षा

मिखा दया:नं मखंमथें जुई मन्त कि शिक्षा ॥

राणातय्सं १०४ वर्षतक व्बंका मत:गु शिक्षा

सात साल आन्दोलन सफल जुसेलि वनेखंगु शिक्षा

भीगु नेपा: लिउने ला:गु नं कारण थ्वहे ख:

आ: वया राजनीति स्थिर मजुया बांला मजु शिक्षा

शिक्षा दतकी तिनि ज्ञान दया देश बांलाके फई

ज्ञान बुद्धि विवेक दयकेत मदय्क मगा शिक्षा

भीपिं समाजय् च्वनिपित व्यवहारिक ज्ञान नं मा:

व्यवहारि ज्ञानं दया, माया समाज म्हासिका च्वने फे

शिक्षा क्षेत्रया वयान याना फुइमखु

थुकिया लम्बाई, चौडाई व गहिराई असिमित दु

शिक्षा भीत मदय्क मगा:

शिक्षा भीत मदय्क मगा: ॥

किपूया गथु प्याखं

(गं मखा:गु प्याखं)



श्रीकृष्ण महर्जन

किपूया गथु प्याखं (गं मखा:गु प्याखं)

सफू बजारय् पिदने धुंकूगु दु थ:गु प्रति सुरक्षित यानादिसँ

सफू दइगु थाय्

१) खपया च्याम्हसिंहया स्टेशनरी पस: (श्याम सुन्दरया पस:)

२) खप कमल विनायकया स्टेशनरी पस:

३) किपूया सत:क्वया स्टेशनरी पस:

४) किपूया देय् पुगूया बाघभैरव स्टेशनरी पस:

५) किपूया पांगा दोवाटोया किपू बूक प्वाइट

६) येंया भोताहिंति नातिबज्रया पस:

७) येंया कुलाभुलिइ च्वंगु मंका: धुकू पस:

८) यल, यल ध्वाखा अर्जुन स्टेशनरी पस:

९) स्वापू नितिं मेमेगु फोन नम्बर: ४३३४०९३, ९८४९७५२५८३, ९८४६०४६९२३९

मू

सच्छि तका जक (१००/-)

सफुतिइ दुने

१) गथु समुदायया इतिहासनिसें वर्तमान तक

२) गथु प्याखनय् दुध्यानाच्वंगु तान्त्रिक व बैदिक दर्शन

३) नास: झ:यात किसिलिं छाथ् तइगु ख: ?

४) किपूया गथु प्याखनय् दुध्यानाच्वंगु थीथी पक्ष

५) गथु प्याखंया थीथी नां

६) किपूया ख्वा:पा: प्याखं मध्ये गथु प्याखं नापं मेमेगु

अन्धविश्वासय् लिकुनाच्चंगु विज्ञान



(नेवा:तयसं न्हापांनिसं थये याये मत्य: अथे याये मत्य: धका: धया वयाच्चंगु दु। थौ वया उकियात अन्धविश्वास धायेगु या:। याये मत्य: धयात:गुया थीथी कार णत दु। उगु कारणायात कुला स्वयेगु ज्या यात धा:सा अन दुने विज्ञान दु। उकिं पन्नारत्न महर्जनं अज्व:गु हे अन्धविश्वासय् लिकुनाच्चंगु विज्ञानयात कया सफू हे च्यादीगु दु। सं)

थी मज्यूपिं मिसातसें बँ थिले मत्य:

बँ थिलेत सियुचा ल:नाप मात्रा मिलय् याना: सौ (गोवर) नं ल्वाक छयायेमा:। थज्या:गुली ताजा सौ स्वयां ध्वगीगु सौ तयेबलय् बांला:। न्ह्याबलें ताजा सौ मदया नं च्वनेफु।

ध्वगीगु सलिइ थीथी कथंया किटाणुत दयाच्वने फु। थुपिं मध्ये भीगु नांगा मिखां खंके मफुपिं सुक्ष्मपिं नं जुइ। थज्या:पिं किटाणुत मध्ये धनुषटंकार (Titanus) ल्वय् जुइकीपिं किटाणुत नं दइ।

थुमिगु मुख्य बास स्थान धयागु ध्वगीगु सौ व सलखि ख:। थ्व कीत तसकं हे खतरनाक। थुमि तसकं हे य:गु धयागु हि ख:। थुपिं भीगु शरीर य् दुहां वना ही ल्वाक ज्यातकि भीत धनुषटंकार ल्वय् जुइ। खय्तला थ्व कित तसकं वमला: धाइ। छगू निगू मात्रा वासलं हे न्हना वनी धाइ। अय्सां

थुपिं छिनभरय् हे यक्व ल्याखय् बढय् जुइफु। म्हो इलय् हे भीगु उसाय् स्यंकेत ता:लायेफु।

थ्व कीत छयंगु त्वखना: भीगु म्हय् दुहां धा:सा वने फइमखु। गनं धा: आदि जुया: हि वयाच्चंगु दतकि व थासं थुपिं भीगु म्हय् दुहां वनी मिसापिनि थिइमज्यू जुइबलय् इमिगु योनिं हि भ्या: दयाच्वने य:।

न्हापा न्हापा मिसापिनि कट्टु, अण्डरवेयर, सुरुवा आदि न्ह्यायेगु चलन मदु। थज्या:गु अवस्थाय् योनिपाखें कीत म्हय् दुने याउँक हे दुहां वनेफइ। थुकिं याना: Titanus जुइगु यक्व सम्भावना जुइ उकिं थी मज्यू जूपिं मिसातसें बँ थिले मत्य: धयात:गु ख:।

थुकथं हे मिसापिन्सं सौ (गोवर) व सलखि नं हाचां गाये मज्यू धयागु नं

चलन दु। हाचां गायेगु धयागु अक्सर लैय् वनेबलय् जुइ। लैय् च्वंगु सौ ताजा वा बासि छुं निश्चित जुइमखु। बासि सौ व सलखि ध्वगिना: थीथी कथंया किटाणुत दयाच्वनी।

थुपिं मध्ये च्वय् धयाथें ज्या:पिं टिटानसया कीत नं जुइफु। थुपिं भीगु नांगां मिखां खंके फइमखु। मिसापिनि थिइ मज्यू जुइगु ईया सिमा द:सां न्ह्याबलें लुमंका च्वने मफये य:। गबलें गबलें गडबड नं जुइफु।

क्व: जूगु व सिमा क्व:द:गु पा:ला धाये थें ल्वमसें थी मज्यूया इलय् सौ हाचां गाये लात धायेवं च्वय् धयाथें ज्या:पिं कीत योनिपाखे जीवनय् असर या:वनी। उकिं थज्या:गु त्व:ता:या समस्या नापं ज्यंका: मिसापिंसं सौ, सलखि हे हाचां गाये मज्यू धयात:गु ख:।



पन्नारत्न महर्जन

न्हापा न्हापा मिसापिनि कट्टु, अण्डरवेयर, सुरुवा

आदि न्ह्यायेगु चलन मदु। थज्या:गु अवस्थाय् योनिपाखें कीत म्हय् दुने याउँक हे दुहां वनेफइ।

थुकिं याना: Titanus जुइगु यक्व सम्भावना जुइ उकिं थी मज्यू जूपिं मिसातसें बँ थिले मत्य: धयात:गु ख:।



नेवा: मखुपिनिगु नेवा: नुग:

श्रीकृष्ण महर्जन

नेवा: मखुपिनिगु नेवा: नुग:

नेवा: मखया नं नेवा: भाय् ल्हाउगु हे कथं एकीकृत माओवादीया नेता सोनाम शेर् चनलिसे नं अन्तर्वाता कायेगु भवलय् नेवा: प्रदेश धयां सुया नं स्पनीमखु धका: धयादीगु ख:। वय्क: नं नेवा: प्रदेशया हे पक्षयाम्ह ख:।

थुगु कथं नेवा: भाय् ल्हाये स:पिं नेवा: मखुपिलिसे अन्तर्वाता कायेगु भवलय् थीथी कथंया सवा: तसकं वयाच्चंगु दु। एफ एमय् कायेगु भवलय् मन्तयसं स: जक ताइगु ख:सा टेलिभिजनय् जुइवं ला ख्वा: तसकं खने दइगु ख:। उकिं टेलिभिजनया नेवा: फल्चा ज्याभव: तसकं प्रभावकारी जुयाच्चंगु दु।

अथे नेवा: भाषं नेवा: मखुपिलिसे अन्तर्वाता कायेगु भवलय् छम्ह नेवा: मखुम्ह तर नेवा: भाय् ल्हानादीम्ह मनुखं ला नेवा: फल्चा ज्याभवलय् वयेत तसकं अस्वीकार यानादीगु ख:। वय्कलं ला स्पष्ट रुपं हे धयादिल कि नेवा:तयगु हक अधिकार नेवा:

राज्य लगायतया खँ वयाच्चंगु अवस्थाय् थ:म्हं नेवा: भासं टेलिभिजनय् वया अन्तर्वाता बिल धा:सा थ:त नेवा:तयगु चि नयात:म्ह धका: थ:गु समाजं धाइ धका: अस्वीकार यानादीगु ख:। ब्रम्हु समुदायया उम्ह मनुयात ता ई तक सहलह व्याका अन्तत: कन्भेन्स याना अन्तर्वाता कया हे त्व:ता। मेट्रो एफ एमाया मरु सत: ज्याभवलय् अले नेपालमण्डल टेलिभिजनया नेवा: फल्चा ज्याभवलय् वय्क:यात स:ता: अन्तर्वाता कायेगु याना।

नेपा:या राजनीतिइ आदिवासी जनजातितय्गु हक अधिकारया नितिं आन्दोलन जुयाच्चंगु अले नेवा: नेवा: मखया नं नेवा: भाय् ल्हानादीपिं मन्तयके नेवा: समाज, नेवा: भाय्, नेवा: संस्कृति नापं थीथी सवालयात कया अन्तर्वाता कायेगु भवलय् तसकं ख्वा: दपिं अले नेवा: मखया नं नेवा: भाय् ल्हाइपिन्त नं यक्व हे व्वनेगु कुत: याना। अले गुलिं अन्तर्वाता विइत तयार जूगुलिं इमिके अन्तर्वाता कयासा गुलिं गुलिं धा:सा मजिउ व वये मखु धका: गबलें नं मध्यायेगु तर गबलें नं ई धा:सा मविइपिं नं यक्व हे दु।



थ्व इलय् वंगु न्हूदँया इलय् किपुलिइ साईकल च्यालीइ व:म्ह छम्ह यमियात नापलात। वय्कलं जित: म्हस्यूगु जुयाच्चन तर जिं बांलाक्क मसिल। अले वय्कलं नेपालमण्डल टेलिभिजनया नेवा: फल्चा ज्याभवलं याना थ:गु छँय् मस्तयत तसकं नेवा: भाय् ल्हाके विइत अ:पुया च्वंगु दु धका: कनादिल। अपाय् अपाय् धपिं मन्तयसं नेवा: मखुपिन्सं ला नेवा: भासं अन्तर्वाता बियाच्वन अले छिमिसं नेवा: भाय् छाय् मल्हायेगु धका: कन्भेन्स याना धका: कनादीगु दु। थुगु कथं नेवा: फल्चा व मरु सत: ज्याभव:यात

सकारात्मक रुपं कायेगु यानाच्चंगु खने दुसा मेखे नेवा: राज्यया खँ वयाच्चंगु अवस्थाय् नेवा: मखया नं नेवा: भाय् ल्हाये स:पिं, नेवा:तयगु गुणगयान याइपिं मेमेगु समुदायया मन्त नं ला यक्व हे दु धका: तायेकीगु स्वभाविक हे ख:।

आ: तकया दुने निस:म्हसिवें अप्व: स्वदेशीनिसं विदेशी, थीथी जाती व समुदायया मन्तयकय् नेवा: भाषं अन्तर्वाता कायेगु ज्या धइगु उलि अ:पुगु पक्कं नं मखु। छगू कथं चुनौतिपूर्ण हे ज्या ख:। अयूनं थ्व ज्या छगू नमुनाया ज्या जुयाच्चंगु दु। अले नेवा: मखया नं नेवा: भाय्

ल्हाइपिं मन्तयगु नुग:या खँ थुइकेगु, नेवा: जुया नं नेवा: भाय् मल्हाइपिन्त न्यतलय् दाइगु अले नेवा: मखया नं नेवा: भाय् ल्हाइपिन्त ह:पा: विइगु ज्या याइ धका: तायेका च्वना।

नेवा: मखया नं नेवा: भाय् ल्हाइपिं मन्तयलिसे थीथी विषययात कया सहलह व्याकेगु भवलय् विशेष याना पाहापिन्सं नेवा:तयगु प्रसंशा हे यानादी।

नेवा:तयगु भव्य नेवा:तयगु जात्रा पर्वनिसं नेवा:त तसकं सोभापिं ख: धका: तसकं धायेगु या:।

इमान्दार नापं भंग: ल्हायेगु ज्या मयाइपिं तर याकनं हे

तंचाईपिं धाईपिं नेवा:त ख: धका: धायेगु याना वयाच्चंगु दु। नेवा: समाजय् च्वना नेवा: भाय् ल्हाये स:गुलिं थ:पिनिगु जीवनय् यक्व हे तिव: जूगु नापं उकिं याना व्यापार व्यवसायसं तसकं ग्वहालि जूगु तसकं खँ न्हयथनादी।

थुगु कथं नेवा: मखया नं नेवा: भाय् ल्हानादीपिं व्यक्तिवर्षलिसे सहलह व्याकेगु नेवा: फल्चा ज्याभव: नेपालमण्डल टेलिभिजनया छगू व्यागलं सवा: जुयाच्चंगु दु। थुगु सवा: संचार ख्यलय् हे न्हूगु कथंया सवा: जुयाच्चंगु दु।



‘नेवा:तयूत न्ह्य:ने यंकेगु नितिं नेवा: पत्रकार व समाज नाप नाप वनेमा:’

ज्वजलपा वा:पौ/

थौया आधुनिक इलय् नेवा: समाजयात न्ह्य:ने यंकेगु नितिं नेवा: पत्रकारत व नेवा: समाजया न्ह्यलुवात जाना मंका: कथं वनेमा:गु खँय् व: विउगु दु । नेवा: पत्रकार राष्ट्रिय दबूया केन्द्रीय नेतृत्व व नाप नेवा: समुदायया थीथी समाजया न्ह्यलुवातय्सं उगु कथंया विचा: प्वंकादीगु ख: ।

बौद्ध युवा कमिटी यलया ग्वसालय् शनिवा: यलय् नेवा: पत्रकार राष्ट्रिय दबूया केन्द्रीय नेतृत्व नापं यल जिल्ला समितिया न्हू निर्वाचित जुयादीपिन्त हनेज्या नाप नाप संचार माध्यमय् स्थानीय व युवातय्गु सरोकार विषसं अन्तर्क्रिया ज्याभ्वलय् अथे न्वंवानादीगु ख: ।

ज्याभ्व:या मूपमाहां अखिल नेपाल भिक्षु महासंघया महासचिव भिक्षु कोडन्य, नेवा: पत्रकार राष्ट्रिय दबूया नाय: श्रीकृष्ण महर्जन, मूछ्याञ्जे सुनिल महर्जन, यल जिल्लाया नाय: सुरजवीर बज्राचार्य, ज्यापु समाज यलया नाय: प्रेमलाल महर्जन, ताम्रकार समाज यलया नाय: रविन्द्र ताम्रकार लगायतपिन्सं उगु कथं न्वंवानादीगु ख: ।

अन्तर्क्रिया ज्याभ्वलय् आ: नेवा: ख्य:या संचार नीति हे तयार याना वनेमा:गु नापं उकिया नितिं नेवा: समाजया न्ह्यलुवा: नापं नेवा: पत्रकारत छगू हे थासय् च्वना सहलह ब्याका वनेमा:गु खँय् व: विउगु ख: । अथे हे नेवा: पहिचान, नेवा: अधिकारनिसें नेवा: ख्य:या नितिं हे नेवा: समाजया न्ह्यलुवा: व नेवा: पत्रकारत नाप नाप वनेमा:गु खँय् सरोकारवालातय्सं व: वियादीगु ख: । अथे हे नेवा: खल: पुच:या न्ह्यलुवातय्सं आ:या इलय् संचारय् पहुँच थ्यंकेकेगु वारे नं विचा: यायेमा: धका: नं खँ पिहां व:गु ख: ।

उगु जयाभ्वलय् बौद्ध युवा कमिटीपाखें नेवा: पत्रकार राष्ट्रिय दबूया केन्द्रीय पदाधिकार व दुज:पिं नापं यल जिल्लाया ज्यासना पुच:यापिन्त हनेज्या या:गु ख:सा भिंतुना पौ नं ल:ल्हा:गु ख: । अथे हे ताम्रकार समाजपाखें नं नेवा: पत्रकारतय्त हनेज्या या:गु ख: ।

वंगु लोकतन्त्र दिवस वैशाख ११ गते किपुलिइ नेवा: पत्रकार राष्ट्रिय दबूया निक्क:गु त:मुंज्या धुसानिसें न्हूगु नेतृत्वयात नेवा: ख्या:या थीथी समाजपाखें हनेज्या याना वयाच्वंगु दु । थ्वसिवें न्ह्य: नेवा: देय् दबू, ज्यापु महारागुथि, नेपालभाषा संकिपा समाज, ज्यापु समाज यल, हलचोक आकाशभैरव गुथि, कलंकी नागढुंगा सतक विस्तारक पीडित संघपाखें ब्यागलं ब्यागलं कथं हनेज्या याये धुकूगु दु ।

हनुमानध्वाखा पुन: निर्माणयात कया सहलह

ज्वजलपा वा:पौ/

सन्ध्या टाइम्स संचार सहकारी संस्था लि.या ग्वसालय् थगुने वैशाख १२ गते त:भुखाचं क्षति जुगु यें हनुमानध्वाखा लायकू लागायी सम्पदा पुन:निर्माण विषययात कया: थौं छगू अन्तरक्रियात्मक ज्याभव: या:गु दु । यें महानगरपालिका हनुमानध्वाखा लायकू संरक्षण ज्याकूया न्हूम्ह कार्यक्रम प्रमुख भाजु उदय पसखल: (श्रेष्ठ)या प्रमुख आतिथ्यताय् उगु ज्याभवलय् नवासें वय्कलं थ: प्रमुख जुया: वये धुंका: मेपिनिगु तुलनाय् छपला: न्ह्या: वनेगु जुइ धयादिल ।

ज्याकूया न्हूम्ह कार्यक्रम प्रमुख जुया: भायादीम्ह वय्क:या ख्यें सगं विया: खादां वखायेका: लसकुस यायेगु ज्या जूगु ख:रा संस्थाया नाय: रमेशकाजी स्थापितया सभापतित्वय् जूगु ज्याभवलय् वय्कलं स्वांम्ह ल:ल्हाना: लसकुस यानादीगु ख:सा नेवा: स्वायत्त राज्य मंका: संघर्ष समिति सचिवालय कजि मल्ल के. सुन्दर खादां वखायेकादीगु ख: । ज्याभवलय् ज्याकू प्रमुख पसखलं हनुमानध्वाखा वसन्तपू लायकू लागायी सम्पदा क्षेत्र पुन:निर्माणया नितिं गुलि चिउता: नेवा:तय्सं कयाच्वंगु ख:, उलि हे यें महानगरपालिका व थ: प्रमुख जुयावयाच्वनागु ज्याकूयात नं चिउता: दु धयादिल । वय्कलं थ: निमित्त नायक जक जुयाच्वंगु धासैं मरुसत: पुन:निर्माणया नितिं पुरातत्व विभागं मा:कथंया सकतां आवश्यक ग्वाहालि बीगु बचं विउगु जानकारी वियादिल । थ:त विउगु सम्मानया कदर यासैं थम्हं नं उकिया मू पुलेकथं सम्पदा क्षेत्रया पुन:निर्माणया नितिं छुं नं छुं ज्या न्ह्याकेगु जुइ धयादिल । ज्याकू प्रमुख पसखलं हनुमानध्वाखा वसन्तपू लायकू लागायी सम्पदा क्षेत्र पुन:निर्माणया नितिं गुलि चिउता: नेवा:तय्सं कयाच्वंगु ख:, उलि हे यें महानगरपालिका व थ: प्रमुख जुयावयाच्वनागु ज्याकूयात नं चिउता: दु धयादिल । वय्कलं थ: निमित्त नायक जक जुयाच्वंगु धासैं मरुसत: पुन:निर्माणया नितिं पुरातत्व विभागं मा:कथंया सकतां आवश्यक ग्वाहालि बीगु बचं विउगु जानकारी वियादिल । ज्याभवलय् मल्ल के. सुन्दरं भी पूर्खापिसं धस्वाका थकूगु नेपालमण्डलया सम्पदात आ: हाकनं गुकथं धस्वाकेगु धइगु खँय् चिउता: प्वंकेमा: धयादिलरा सम्पदा पुन:निर्माणय् महानगरपालिकाया जक चिउता: मजूसै थ्व राष्ट्रिय व अन्तराष्ट्रिय चिउता:या विषय जूगु खँ वय्कलं कनादिल । भुखाचं क्षति जुगु मरुसत:, माजु देग:, दश अवतार देग: जकमखसे पुन:निर्माण यायेवलय् उगु लागी व उकिया ज:ख: च्वंगु जीवन्त अभौतिक सम्पदात नं संरक्षण यायेगु खँय् ध्यान बीमा: धयादिल ।

वाह्य चक्रपथया खँ वयेवं जग्गाया भा: थहाँवन

ज्वजलपा वा:पौ/

थ्व नं छगू समस्या हे जुइ । न्हूगु वस्ति जुइवं वि.सं. २०६५ सालय् ह:गु वाह्य चक्रपथ योजनाया जग्गाया भा: थिकेजुइ । थिकेभावं भीथार्यपिन्सं गुलि खँ हानं पिहांव:गु दु । उगु चक्रपथया लम्वाई काठमाडौं जग्गा न्यायफइ । अखिर व जग्गाला पिनेर्चपिन्सं हे जिल्लाय् ३५.०८ कि.मि., ललितपुर जिल्लाय् १५.०८ जक न्यायफइ । थुगुकथं कन्हे भी सन्ततित स्वनिगलं कि.मि. व भक्तपुर जिल्लाय् २१.०५ किमि ला: । विस्थापित जुइगु यक्व सम्भावना दु धका: न्हापा न्हापा यक्व चर्चाय् व:सां अन्न सइगु जमिन म्हो किपूमितसें हे विरोध याना: थ्व योजना दिना:च्वंगु ख: । जुइगु, बातावरणय् क्षति जुइधका: तर आ: छु जुया: स्वीकृति विल धइगु खँ थुइके विरोध जूगुलिं ज्या न्ह्याके मफुगु ख: । आ: वया किपू मफुनि । यलय् ख्वपय् गनं हे थ्व चक्रपथ दयेकेत नगरपालिका व राजनैतिक संयन्त्र स्वीकृति बिइवं किसानतसें स्वीकृति बिउगु मरुनि । अय्सां छु सतुंगलं ज्या न्ह्याकेगु कुत: यानाच्वंगु दु । सायद न्हूगु बजेट चोभार तक जक जूसां वाह्यचक्रपथ दयेकीगु लिपा ज्या सुरु जुइला ? थुगु वाह्यचक्रपथया लँ ५० ख:ला ? वाह्यचक्रपथया लँ हाइटेन्सन लाइनया क्वं मि. तब्ब्या जुइसा । लँया जक्खवं २५० मि.या वस्ति जुइधइगु खँ दु । थथेजुल धा:सा न्हापा हे मुआब्जा विकासया नितिं जग्गा अधिग्रहण याइ । उगु जग्गाया बियातये धुकूगु जग्गाया मुआब्जा बिइमाली मखु । मुआब्जा बिइमखु । तर ल्यागु जग्गाया भा: थहाँवनी वाह्यचक्रपथया खँ वयेवं सम्भावित थासय्वा जग्गाया धका: जग्गावालापिन्त लोभ क्यंगु दु । करीव ९००० भा: थिकय् जूगु खँ सम्बन्धित जग्गावालातसें धा:गु रोपनी जग्गा माली । चोभारनिसें सतुंग:तकया दुने दु । न्हापा गोरेटो लँ दुगु थासय् आनां निगू लाख थ्यंमथ्यं ४००० जनसंख्याया वस्ति दइ । उलिमछि, बिउथाय् आ: लँहे मदुगु जग्गाया नं आनां न्यागु लाख जनसंख्यायात मा:गु ल:, ध:या व्यवस्था गुगुकथं याइ बिउव:गु दु ।

तपाईंको टोलमा भएका घटना कीर्तिपुरको समाचार बनाउने हो भने तपाईं एक कल फोन गर्नुस् हामी तपाईंको टोलको समाचार कीर्तिपुरको समाचार बनाईदिनेछौं

कीर्तिपुरको
चित्रण



किपुलिं पिदनाच्वंगु कीर्तिपुर सन्देश वा:पौ व ज्वजलपा: वा:पौया ग्राहक जुइगु नितिं स्वापू तयादिसँ

कार्यालय: निखासी टोल: कीर्तिपुर नपा-३
फोन नं.: ४३३३००७, ९८४१४०१०७७

ज्वजलपा वा:पतिइ छिगू चिनाखँ/बाखं/हाइकू विज्ञापन व मेमेगु च्वसू पिथनेगु जूसा जिमित स्वापू तयादिसँ



सकलसिगु मंका: स:

ज्वजलपा वा:पौ

ज्याकू: निखासी त्वा: किपू नपा-३ फोन ल्या: ४३३३००७, ९८०८६२६४२० ई-मेल : kirtipur_sandesh@live.com